

Qeqqata Kommuniáni qitsuuteqarnermi ileqqoreqqusaq

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktober 1998-imeersumi § 13-imi imm. 1 aamma § 28-mi imm. 2 aamma 4 naapertorlugit, Inatsisartut inatsisaatigut nr. 23-atigut, 22. novembari 2011-mi kingullertut allanngortinneqar-tumi aalajangerneqarpoq:

Kapitali 1

Aallaqqaasiut

§ 1. Ileqqoreqqusaq Qeqqata Kommunianut atuuppoq.

Kapitali 2

Qimminik qimuttoqarfup iluani avataanilu ataatsimoortumik aalajangersakkat

§ 2. Qeqqata Kommuniáni kommunalbestyrelsi allakkatigut akuersissuteqaaqqaartillugu Qeqqata Kommuniáni qitsuuteqartoqarsinnaavoq.

Imm. 2. Qitsuuteqarsinnaanermut akuersisummik qinnuteqaat Qeqqata Kommuniáni Teknikkimut Avatangiisinullu Immikkoortortamut nassiunneqassaaq.

Imm. 3. Akuersissut tunineqartuinarmut atuuppoq, allanullu tunniunneqarsinnaanani.

Imm. 4. Ileqqoreqqusamik matuminnga annertuumik arlaleriarlutilluunniit unioqqutsitsisimasunut, qitsuuteqarsinnaanermut akuersisummik tunniussinnginnissaminik kommunalbestyrelsi aalajangiisnaavoq.

§ 3. Maleruagassat qaqugukkulluunniit atuuttut naapertorlugit qitsuit akiuussutissamik kapineqarsimassapput.

Imm. 2. Qimminik nakkutilliisup uppersaata, akiuussutissamik kapititsisimanermut immersorsimasaa imaluunniit akiuussutissamik kapitissimaneranut uumasut nakorsaata uppersaataa uppersaaitut atorineqassaaq.

Imm. 3. Perlerorsinnaanermut akiuussutissamik kapitissimanermut uppersaammik takussutissartalimmik, qitsuit qungasequteqartinneqassapput.

Imm. 4. Imm. 3-mi taaneqarluni perlerorsinnaanermut akiuussutissamik kapitissimanermut uppersaataip tunuatungaani piginnittup oqarasuaataa normua kigartorlugu allanneqarsimassaaq.

Imm. 5. Kigartuut qimminik nakkutilliisumut imaluunniit Teknikkimut Avatangiisinullu Immikkoortortap allatseqarfianut attarsiniarneqarsinnaavoq.

Imm. 6. Allakkatigut akuersissut piginnittumit tigummineqartassaaq, piumasarineqartillugulu takutinneqartassalluni.

§ 4. Qitsuit silami angalaannartinneqaqqusaanngillat.

Imm. 2. Qitsuit illup iluaniisinneqassapput imaluunniit silamiisinneqassagunik ungalusamiisinneqassallutik.

Imm. 3. Qitsunnik silamiisitsinissamut ungalusaliornissaq kissaatigigaanni, Teknikkimut Avatangiisinullu Immikkoortortamut nunaminertamik atugassinneqarnissamik qinnuteqartoqassaaq.

§ 5. Qitsuit silami ungalusamiisinneqartut panertumik nallavissaqartinneqassapput, soorluttaaq imissaqartinneqartuassasut imaluunniit aputitugassaqaassasut.

Imm. 2. Qitsuit silami ungalusamiisinneqartut minnerpaamik ullormut ataasiartumik takusarneqartassapput.

§ 6. Qitsuit illup iluaniisinneqartut panertumik nallavissaqartinneqassapput, soorluttaaq imissaqartinneqartuassasut.

§ 7. Qitsuit kinguaassiortinneqaqqusaanngillat.

Imm. 2. Qitsuit arnavissat nakorsaaitortinneqarnerisigut pilatsinneqarnerisigulluunnit kinguaassiorsinnaajunnaarsinneqarsimassapput.

Imm. 3. Qitsuit angutivissat suliaritinnermikkut kinguaassiorsinnaajunnaarsinneqarsimassapput

Imm. 4. Qitsummik imaluunniit qitsunnik piginnittup imm. 2 imaluunniit imm. 3 naapertorlugu kinguaassiorsinnaajunnaarsinneqarsimanera imaluunniit kinguaassiorsinnaajunnaarsinneqarsimaneri, kommunimut uppersarsinnaassavaa imaluunniit uppersarsinnaassavai.

Kapitali 3

Qimminik nakkutilliisoq aamma qitsuit angalaannartut, pigineqanngitsut kiisalu qimminik qimuttoqarfiup iluani avataanilu unioqqutitsisumik qitsunnik eqqussineq pillugit nalinginnaasumik aalajangersakkat

§ 8. Tullinnguuttunik suliaqarnissamik akisussaasussanik qimminik nakkutilliisumik imaluunniit nakkutilliisunik kommunalbestyrelsi toqqaassaaq:

- 1) qitsunnik piginnittunik nalunaarsuinerit,
- 2) qitsunnik angalaannartunik, pigineqanngitsunillu kiisalu unioqqutitsisumik eqqussanik qitsutigineqartunillu toqutsinerit tigusinerilluunniit,
- 3) qitsunnik unioqqutitsisumik eqqussat qitsutigineqartullu tassaapput, qitsuit kommunimit akuersissutitaqanngitsumik qitsutigineqartut pineqarput, takuuk § 2,
- 4) qitsunnik akiuussutissamik kapuuinerit,
- 5) akiuussutissamik kapuunernik, kapuutillu uninngasuutit nalunaarsorneqarnerat kiisalu taakku uumasut nakorsaannut nalunaarutigineqartarnissaat.

§ 9. Qitsuit angalaannartut kiisalu qitsuit unioqqutitsisumik eqqussat qitsutigineqartullu qimminik nakkutilliisunut aatinneqartassapput.

Imm. 2. Uumasunik imm. 1-imi taaneqartunik piginnittoq, pissutsinik iluarsiiisuteqarnissaanut piffissalerlugu siumut ilisimatinneqassaaq. Ullunik pingasunik siumut ilimasaaruteqarneq naammattutut isigineqarpoq. Piffissaliunneqartup iluani pissutsit iluarsiiivigineqarsimanngippata, siumut ilisimatitsinertaqanngitsumik piginnittumullu taarsiissutitaqanngitsumik qitsuk toqunneqassaaq.

Imm. 3. Qitsuk angalaannartoq qimminik nakkutilliisumit tiguneqarpat, qitsummik piginnittoq aallersinnaatillugu qitsuk kommunip sannaviani ungalusamiisinneqassaaq. Qimminik nakkutilliisup qitsummik piginnittoq attavigissavaa, ullullu pingasut qaangiutsinnagit piginnittup qitsutini aasimanngippagu, piginnittumut taarsiissutitaqanngitsumik qitsuk toqunneqassaaq. Patsisissaqarlualuni

qitsuk aaneqarsinnaanngippat, qitsuup aaneqarnissaanut piffissaliussap sivitsorneqarnissaanik qimminik nakkutilliisoq isumaqatiginiarneqassaaq.

Kapitali 4

Maalaaruteqarnerit

§ 10. Qitsuuteqarnermut tunngatillugu maalaarutiginiakkat, kommunalbestyrelsimut nassiunneqartassapput. Malittarisassanut tunngatillugu maalaarutit politiinut nassiunneqartassapput.

Kapitali 5

Pineqaatissiissutaasinnaasut

§ 11. Ileqqoreqqusamik matuminnga unioqutitsisoqartillugu, Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni § 28-mi imm. 2 naapertorlugu akiligassiisoqarsinnaavoq.
Imm. 2. Ileqqoreqqusamik matuminnga annertuumik arlaleriartumilluunniit unioqutitsisoqartillugu, Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni § 28-mi imm. 2 naapertorlugu uumasuteqaqqusaajunnaarsitsisoqarsinnaallunilu uumasunik passussisinnaajunnaarsitsisoqarsinnaavoq.

Kapitali 6

Atuutilerfia

§ 12. Ileqqoreqqusaq qaammammi atuuttussanngortinneqarfusumi atuutilerpoq.
Imm. 2. Atuutilernera ilutigalugu Maniitsumi qimmeqarnermut qitsuuteqarnermullu ileqqoreqqusaq 2005-imi aggustip 17-ianeersoq atorunnaarsinneqarpoq.

Taamaalilluni 2014-imi aggustip 28-ani kommunalbestyrelsimit akuersissutigineqarpoq.

Hermann Berthelsen
Borgmesteri

Matumuuna Qeqqata Kommuniani qitsuuteqarnermi ileqqoreqqusaq atuuttussanngortinneqarpoq.

Namminersorlutik Oqartussat, ulloq 11. februar 2015

Karl-Kristian Kruse
Aalisarnermut, Piniarnermut Nunalerinermullu Naalakkersuisoq

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut